



Diskursu: Versaun 3.2

Debate Parlamentár kona-ba

Pedidu Renovasaun Estadu Emerjénsia da-15
Parlamentu Nasionál, loron 30 fulan-juñu tinan 2021

Sua Exelénsia

Señór Prezidente Parlamentu Nasionál;

Sua Exelénsia,

Vise-Prezidente sira, Sekretária no Vise-Sekretáriu sira Parlamentu Nasionál nian;

Sua Exelénsia,

Señora no Señór Deputadu sira husi Bankada Política hotu-hotu;

Exelénsia, Karu kolega,

Membru Governu Konstitusionál VIII sira;

Distintu Konvidadu sira;

Señora no Señór sira,

Nudar onra ida mai hau atu mai iha uma fukun parlamentu nasional ida ne'e hodi xefia delegasaun Governu nian no representa hela Señor Primeiru-Ministru.

Liu-ona semana 4 iha implementasaun Deklarasaun Estadu Emerjénsia dala 14, ho satisfasaun moderada no otimizmu maka ita asiste evolusaun positiva husi implementasaun medida prinsipál sira kona-ba prevensaun, jestaun no kombate hasoru Pandemia COVID-19 iha terrenu.

Karik deklarasaun estadu emerjénsia nian renova, Governu sei iha kbiit atu renova medida prinsipál sira-ne'ebé sai hanesan baze ba profilasia COVID-19, ne'ebé iha balu maka ami hakarak destaka iha-ne'e hanesan atu halo:

- impozisaun kuarentena obrigatória nian ba kazu suspeitu sira;
- izolamentu ba kazu pozitivu sira;
- impozisaun serka sanitária sira iha foku propagasaun moras nian sira; no



- limitasaun movimentu sira iha munísipiu sira ne'ebé afetadu;

Oras ne'e daudaun ita bele sente satisfasaun moderada ida ne'ebe'e motiva husi mudansa dados estatístiku loro-loron nian ne'ebé rekolla ona iha terrenu, ne'ebé agora hatudu kurva tuun ka dekresente ida iha propagasaun moras ne'e nian.

Ita bele ona aproveita efeitou pozitivu ka diak hirak husi aumentu regulár husi númeru sidadaun sira ne'ebé simu ona vasina kontra COVID-19, ne'ebé iha loron 22 fulan-juñu sa'e liu ona husi ema hamutuk 127, 802 (rihun atus-ida ruanulu-resin-hitu, atus-ualu-rua) ho idade tinan 18 ba leten, atu ho nune'e ita bele satan propagasaun deskontrolada husi moras ne'e.

Maske iha espetativa ka previzaun la di'ak oin-oin iha fulan hirak liuba, númeru infesaun nian sira nafatin menus husi kazu ativu akumuladu rihun ida (790 iha horiseik, 29 Juñu kazu ativu) no ita rejista númeru infesaun loron nian ne'ebé ki'ik (kazu 56 iha loron 27 fulan-juñu, 20 iha loron 28, no 65 iha loron 29 fulan juñu), liga ho kazu grave sira ne'ebé menus ba beibeik.

Governu iha konviksaun katak Timor-Leste iha dalan ne'ebé di'ak atu hatan ba propagasaun moras ne'e nian no hakarak atu mantein tendénsia dezkraxente husi númeru kazu loro-loron nian husi diagnóstiku COVID-19 ne'ebe sustentavel no definitiva, atu nune'e bele kria kondisaun hirak ne'ebé presiza hodi bele hamamar medida restritiva sira ne'ebé impoin ba ita-nia sidadaun sira no hakarak tebtibes atu fila neneik-neneik ba normalidade, nu'udar rezultadu husi situasaun epidemiolójika nasionál ne'ebé iha mudansa di'ak.

Hanesan saida mak ita sei la haluha katak, iha fulan-maiu tinan 2021 nia rohan, ita-nia país konfronta ho previzaun pesimista sira ne'ebé alerta katak ita-nia situasaun epidemiolójika bele sai aat liu no bele iha risku atu ita-nia servisu sira husi Sistema Nasionál Saúde nian bele hetan presaan ne'ebé sei hamate ninia kapasidade atu asegura prestasaun kuidadu saúde nian sira, hanesan saida maka akontese ona iha país sira-seluk.



Iha momentu ne'ebá, ita rejista katak kazu infesaun foun loro-loron nian ho SARS-COV-2 ultrapasa ona atus rua resin no ita laran taridu katak número kazu ne'ebé rejista loro-loron bele aumenta to'ó rihun ida iha semana balun nia laran tan.

Sorte di'ak ita bele evita senáriu hirak ne'ebé aat liu bele akontese no hamamar medida balun ne'ebé Governu adota hodi satan pandemia ne'e, liuliu hapara konfinamentu ba populasaun iha sidade Dili, iha ne'ebé, iha fulan kotuk, situasaun hamosu preokupasaun maka'as tebes.

Inversaun husi tendénsia kreximentu beibeik husi pandemia iha ita-nia territóriu nasional /ou ho forma seluk ita dehan tendensia foun ba desaselerasaun ba moras nia daet/ ne'e akontese tanba lote foun sira husi vasina AstraZeneca no SinoVac to'ó mai ona, ne'ebé fó liuhusi Sistema Kooperasaun Internasionál Nasoins Unidas nian, ne'ebé koñesidu ho naran COVAX, maibé mós liuhusi kooperasaun bilaterál entre ita-nia Governu ho Governu Austrália no Governu Repúblika Populár Xina, ne'ebé permite atu, to'ó **loron 09 fulan-juñu tinan 2021, ita bele simu vasina besik doze 295.800**, nune'e, durante fulan-juñu ita bele habelar ezekusaun husi Planu Nasionál Vasinasaun nian ne'ebé agora ativu iha munisípiu hotu-hotu iha ita-nia país no Rejiaun Administrativa Espesiál Oekusi Ambenu.

Maske alkansa ona rezultadu di'ak sira, Governu manifesta ona ninia ambisaun atu, iha semana hirak oinmai, bele aumenta ninia meta kona-ba número imunizasaun loro-loron nian ba ema hamutuk 10.000, hodi reforsa ho empenhu, vigór no enerjia, atividade sira-ne'ebé nesesária hodi onra kompromisu atu vasina, pelumenus, 80% husi populasaun ne'ebé maka hela iha Timor-Leste ho idade sanulu resin ualu ba leten, to'ó tinan ida-ne'e nia rohan.

Señór Prezidente Parlamentu Nasionál,

Distinta Deputada no Distintu Deputadu sira,

Governu ne'e propoin atu ezekuta ho lalais no efikásia, asaun hirak ne'ebé presiza no adekuada atu kumpre objetivu sira ne'ebé hatuur ona iha Planu Vasinasaun kontra COVID-19 nian, tanba Governu hatene katak ho de'it vasinasaun lalais no ba ita-nia populasaun tomak maka sei permite proteje saúde pública iha Timor-Leste, nune'e mós asegura regresu neneik ba



normalidade sosiál no ekonómika, ne'ebé afeta maka'as tebes husi situasaun pandémika ne'ebé mosu husikedas inísiu tinan kotuk.

Governu ne'e konsidera mós katak rezultadu di'ak sira ne'ebé alkansa ona no einjerál bele alkansa tanba esforsu koordenasau interdepartamentál sira ne'ebé dezenvolve ona to'o oras ne'e, liuhusi kolaborasau ho Organizasaun Mundiál Saúde nian no ho Parseiru Dezenvolvimentu sira, no ho organizasaun governamental no não governamental nasional no internasionál sira.

Tanba governu hakarak halo di'ak liután ba buat hirak nebe ita alkansa ona maka ita envolve sidadaun no sira-nia família liuhusi autoridade lokál no intensifika servisu hamutuk ho organizasaun sira husi ita-nia sociedade sivíl, hodi loke an nafatin ba sira-nia sujestaun, rekomendasau sira no sira-nia crítica mós.

Ita-nia istória hatudu ona to'o oras ne'e katak estabelesimentu parseria entre Estadu no Organizasaun sociedade sivíl no organizasaun komunitária sira iha kapasidade hodi mobiliza ita-nia Povu atu konkretiza objetivu nasional nian sira, nune'e mós atu hadi'a neneik maibé bebeik organizasaun, funcionamentu no qualidade husi ita-nia servisu públiku sira.

Ami hatene katak, haree ba dimensaun husi dezafiu ne'ebé pandemia representa ba ita-nia Estadu, no ba kompleksidade ne'ebé iha relasaun ho estratéjia ne'ebé tenke ezekuta hodi satan progresau pandemia ne'e nian iha territóriu nasional, presiza envolvimentu ema hotu-hotu nian, sein tau ses ema ida.

Iha momentu ne'ebé Governu defende autorizasaun parlamentár ba Renovasaun Deklarasaun Estadu Emerjénsia iha Uma Fukun Demokrasia nian ida-ne'e, Governu reafirma ninia entendimentu kona-ba sentralidade no nesidade atu kontinua mobiliza ema hotu nia partisipasaun, la'ós de'it husi funcionáriu sira husi "*Linha da Frente*", ajente saúde, seguransa, defeza no protesau sivíl nian, maibé mós husi sidadaun hotu-hotu, husi família sira, husi funcionáriu setór privadu, husi empreza no husi organizasaun sociedade sivíl no organizasaun komunitária sira, iha esforsu nasional no unitáriu atu kombat pandemia ne'e, ne'ebé sai determinante tebetebes atu alkansa susesu ne'ebé ita hakarak hetan no hanesan dalan úniku atu fila ba normalidade.



Mobilizasaun nasionál ne'ebé ita konvoka ne'e ejize atu ema ema hotu-hotu respeita nafatin prátika di'ak individuál ka kolektiva sira kona-ba prevensaun COVID-19, liu-liu iha momentu ida ne'ebé variante foun virus nian, ne'ebé da'et lalais liu, mosu daudaun ona iha ita-nia nasaun viziñu sira.

Tanba ne'e, importante atu ita ida-idak asume responsabilidade no atu tau-matan ba ita-nia saúde no mós ba ema seluk nia saúde, liuhusi prátika sira hanesan uza máskara, fase liman beibeik no kumpre regra distansiamentu sosiál.

Ita hotu-hotu, sein exesaun, tenke adota hahalok konxiente, solidária, responsavel no laran-luak, dook husi hahalok individualizmu no egoizmu ne'ebé karakteriza ema hirak ne'ebé lakohi adota komportamentu no kuidadu hirak ne'e, ne'ebé fó risku ba timoroan hotu nia saúde no moris.

Konxiente kona-ba deskonfortu no limitasaun ne'ebé, ba ita ida-idak no ba ita-nia comunidade nasionál, maihusi kumprimentu ba medida sira ne'ebé presiza adota hodi satan evolusaun pandemia ne'e nian iha Timor-Leste, Governu sei kontinua akompañã situasaun internasionál no rona konsellu tékniku husi profesionál saúde nian sira atu nune'e, medida hirak ne'ebé ita tenke adota sira sei ajusta ho kontestu internasionál no adapta ba situasaun réal iha terrenu, iha ita-nia País.

Ho nune'e, Governu ne'ebe lidera husi Primeiru-Ministru, Taur Matan Ruak, konkorda ho renovasaun ba deklarasaun Estado Emerjénsia, ba períodu loron tolunulu, no apela atu Parlamentu Nasionál autoriza Sua Eselénsia Prezidente Repúblika hodi renova deklarasaun estado emergjénsia ne'ebé importante tebes, tuir saida maka Señor Xefe Estado propoin ona.

Obrigadu barak.